

Morto Anto Kiku?

Kiku ta sosodé despues di morto? Esaki ta un pregunta di suma importansia ku tur hende ta hasi. Nos tur ke sa e kontesta pa nos mes i nos sernan kerí.

Lastimamente, religionnan no tin un kontestá unánimo. Algun religion ta insistí ku morto ta final di eksistensia di e ser humano. Otronan ta kere den reinkarnashon. Segun nan, alma di e defunto ta sigui nase atrobe den forma di un bestia òf hende pa e ser purifiká te finalmente e alma ta uni ku Dios. Tin religion ku ta siña ku bon hende ta inkonsiente despues di morto i ta haña nan tino bèk ora Dios ta resusitá nan. Segun konsepto di otronan, e alma mester ta purifiká promé ku e por drenta shelu, i esei ta tuma lugá na purgatorio.

Nos por tin nos teoria preferí. Ma e pregunta importante ta KIKU BEIBEL TA BISA? Paga bon tinu na Hesus Su storia den Lukas 16:19-31. E ta e úniko Pèrsona ku SA SIGUR LOKE LO SOSODE despues di morto, i E ta konta e storia aki komo un evento bèrdat, no un parabola.

"Tabatin un hòmber riku, i e tabata bisti püs i paña masha finí, bibando tur dia kontentu i luhoso. I tabatin un limosnero ku yama Lazaro, ku tabata drumi dilanti di su porta yen di yaga. I e tabata deseá pa yena su barika ku garná di pan ku tabata kai fo'i mesa dje riku; ma kachónan tambe tabata bin i lembe su yaganan. I a sosodé ku e limosnero a muri, i el a wòrdu hibá den skochi di Abraham pa e angelnan. I e riku tambe a muri i a wòrdu derá. I den fièrnu, ora ku e tabata hisa su wowo, siendo den doló, el a mira Abraham djaleu i Lazaro den su skochi. I el a grita i bisa, 'Tata Abraham, tene piedat ku mi manda Lazaro ku e por muha punta di su dede ku awa, i e por freska mi lenga, pasobra mi ta sufri doló den e kandela aki.' Ma Abraham a bisa, 'Yu, kòrda ku bo a risibí loke ta dushi den bo bida, i Lazaro tambe loke ta malu; i awor e ta wòrdu konsolá i bo ta sufri doló. I fuera esei, meimei di nos ku boso tin un presipisio grandi, asina ku esnan djaki ku ke bai serka boso no por, ni tampoko esnan ku ta ei por bini serka nos.' I el a bisa, 'Mi ta rogábo, tata, ku bo por mand'é na kas di mi tata, pasobra mi tin sinku ruman hòmber, ku e por spièrta nan pa nan tambe no bin den e lugá aki di tormentu.' Abraham a bis'é, 'Nan tin Moises i e profetanan. Laga nan tende eseinan.' I el a bisa, 'No, tata Abraham, ma si un ku a muri a bai serka nan, lo nan a kombertí nan.' Ma Abraham a bis'é, 'Si nan no tende Moises i e profetanan, asina tambe lo nan no ta konvensé, maske ku un a resusitá di morto.'"

Morto anto kiku? E teksto aki ta laga sa ku hende ta inmortal, ku e ta sigui eksistí despues di graf. Morto fisiko no ta final di eksistensia di hende.

Nota tambe ku e defunto ta yega na un di dos destino. Hudiunan a yama e lugá di alegria, "skochi di Abraham." Otro teksto ta indiká ku esnan ku a regla nan asuntonan pa ku Dios lo ta serka djE instantaneamente. Papiando di morto, apòstel Pablo a splika: "...tanten nos ta den nos kurpa, nos no por biba serka Señor...nos ta preferá di troka kas di nos kurpa i biba serka Señor" (2 Korintionan 5:6,8). E di dos destino ta un "lugá di tormentu". Nos no ta gusta e doktrina aki; hopi religion ta purba splik'é otro manera. Ma esei no ta kambia e echu. E ta den Beibel. Hesus mes a laga sa di e lugá aki.

Lukas 16 ta revelá ku esnan ku a muri ta konsiente: nan ta papia, tende, mira, kòrda, rasoná, i (na lugá di tormentu) ta sinti doló. Ademas e ta indiká ku no tin oportunitat pa kambia destino despues di morto dor di purgatorio.

Hopi hende no ta hasi kaso di e spiertamentu di Skritura (hudiunan a yama Beibel "Moises i e profetanan") tokante un lugá di tormentu. Segun e teksto aki, si un defunto a resusitá i konta nan, tòg nan lo no ta konvensé.

Morto anto kiku? Palabra di Dios su informashon ta adekuá! Bo por asept'é òf rechas'é, pero esei no ta kambia e faktonan di Beibel. E ta deklará ku tin dos destino so: un lugá di alegria i un di tormentu konsiente.

Kada pèrsona lo ta na un di nan dos pa tur eternidat, sin chèns pa kambia destino despues di morto. Bo tin oportunitat pa hasi esei durante bo bida awor. Kiku ta bin despues di BO morto?